

I. Determinaziuns generalas

Art. 1 Noziun

- ¹ Sefundond sils artechels 98 ss. dalla constituziun cantunala e silla constituziun dalla Baselia catolic-romana dil Grischun exista a Mustér ina pleiv catolic-romana.
- ² Ils cunfins dalla pleiv corrispundan als cunfins dalla vischnaunca politica da Mustér.
- ³ La pleiv ei ina corporaziun dil dretg public.

Art. 2 Intent

- ¹ La pleiv procura pils mieds necessaris dalla pastoraziun e protegia la libertad digl operar pastoral.
- ² Ella promova il contact denter ils commembers e sustegn en collaboraziun cul plevon la veta religiosa e morala.
- ³ Ella representa ils interess da ses commembers enviers las autoritads ecclesiasticas e publicas.
- ⁴ Ella metta a disposiziun l'infrastructura per l'instrucziun religiosa dils affons da Mustér.
- ⁵ Ella risguarda ils basegns specials dils hosps, dil personal stagionari e dils luvrers jasters.
- ⁶ Ella promova vicendeivlamein relaziuns cun pleivs ed instituziuns dad outras religiuns ni confessiuns e gida a sliGAR pensums generals el spért ecumen.
- ⁷ Ella sestenta per ina collaboraziun ella pastoraziun surregionala.

Art. 3 Commembers

- ¹ Commembers dalla pleiv ein tuttas personas da confessiun catolic-romana che habiteschan a Mustér.
- ² L'extrada dalla pleiv succeda entras ina comunicaziun a scret adressada alla suprastonza dalla pleiv. La pleiv conferma l'extrada a cuorta vesta.

Art. 4 Dretg da votar, eligibladad

- 1 Il dretg da votar cumpeta a tuts commembers che habiteschan enteifer il territori dalla pleiv, senza differenza da naziunalitad, e che han cumpleniu 18 onns.
- 2 Il dretg da vegnir eligius cumpeta a tuts commembers sur 18 onns.

Art. 5 Interpellaziun

- 1 A caschun d'ina radunonza dalla pleiv sa scadin pretender sclariment dalla suprastonza pertuccont situaziun ni liquidaziun d'ina fatschenta. Quella sto star en connex cullas tractandas publicadas.
- 2 La suprastonza sa rispunder sco suonda:
 - immediat
 - a scret el mied official da publicaziun
 - a bucca, a caschun dalla proxima radunonza dalla pleiv
- 3 Ina risposta sa vegnir refusada aschinavon che impurtonts interess dalla pleiv ni da tiarzas persunas giustificheschon quei.

Art. 6 Petiziun

Scadin commember dalla pleiv sa inoltrar propostas e petiziuns che pertuccan damondas specialas ni generalas dalla pleiv. Quellas ston vegnir fatgas a scret per mauns dalla suprastonza. La suprastonza ei obligada da prender posiziun a scret ni a bucca viers quellas.

Art. 7 Moziun

Scadin votant ha il dretg da far propostas a caschun da radunonzas dalla pleiv era partenent fatschentas e caussas ch'èin buca publicadas sin la gliesta da tractandas. Vegn ina tala proposta acceptada dalla radunonza sco moziun, sto la suprastonza suttametter rapport e proposta alla proxima radunonza.

Art. 8 Iniziativa

In'iniziativa alla radunonza dalla pleiv ei d'inoltrar a scret e cun ina motivaziun alla suprastonza dalla pleiv. Ella sto esser suttascretta da silmeins 30 votantas e votants. La suprastonza ei obligada da suttametter ina tala iniziativa enteifer sis meins alla radunonza dalla pleiv e quei cun allegar sia posiziun ni eventualmein cun far ina cunterproposta.

II. Determinaziuns organisatorias

1. Disposiziuns generalas

Art. 9 Organs

- ¹ Ils organs dalla pleiv ein:
 - a) la radunonza dalla pleiv
 - b) la suprastonza dalla pleiv
 - c) il revisorat
- ² Il cussegl pastoral dalla pleiv ei in organ ecclesiastic. Sia funcziun, sias cumpetenzas e cumposiziun vegnan definidas en in regulativ separau.

Art. 10 Exclusiun e recusaziun, prender stgisa

- ¹ Alla suprastonza dalla pleiv ed al revisorat astgan buca appartener il medem temps:
 - a) conjugals;
 - b) partenaris registrai;
 - c) persunas, che vivan facticamein en ina cuminonza da veta;
 - d) parents e quinais en lingia directa.
- ² Emploiai dalla pleiv cun in pensum sur 50% astgan buca appartener alla suprastonza dalla pleiv. Al revisorat astgan emploiai dalla pleiv in summa buca appartener.
- ³ In commember dalla suprastonza dalla pleiv ni dil revisorat ei obligaus da prender stgisa tier la tractaziun da fatschentas che pertuccan el sez ni ina persuna menziunada en alinea 1, aschinavon ch'els han in interess personal direct en caussa.

2. La radunonza dalla pleiv

Art. 11 Organ suprem

La radunonza dalla pleiv ei igl organ suprem dalla pleiv. Ella cumpeglia ils commembers cun dretg da votar.

Art. 12 Cumpetenzas

¹ La radunonza dalla pleiv ha las suandontas cumpetenzas:

- a) relasch e midadas dalla constituziun;
- b) relasch, midadas e cassaziun da leschas;
- c) elecziun dalla presidenta/dil president dalla pleiv e dils ulteriurs commembers dalla suprastonza;
- d) elecziun dil revisorat;
- e) elecziun e nunreelecziun dil plevon tenor il dretg dalla Baseligia cantunala;
- f) elecziun e nunreelecziun dalla menadra/dil menader dalla pleiv en cass d'ina vacanza da plevon;
- g) approbaziun dil rapport annual dalla suprastonza dalla pleiv;
- h) prender enconuschientscha dil rapport da lavur dil plevon ni dalla menadra/dil menader dalla pleiv;
- i) approbaziun dil quen annual;
- j) fixaziun dil pei da taglia per la taglia da pleiv;
- k) approbaziun dil preventiv;
- l) conclus davart expensas che survargan la cumpetenzza dalla suprastonza;
- m) vender, brattar, impegnar beins immobiliars;
- n) decisiun davart iniziativas;
- o) decisiun davart la fusiun cun autras pleivs;
- p) decisiuns davart damondas resalvadas expressivamein alla radunonza ni che vegnan suttemessas ad ella.

Art. 13 Convocaziun

- ¹ La radunonza dalla pleiv ordinaria ha liug el decuors dall'emprema mesadad digl onn. La convocaziun ha da succeder silmeins 10 dis avon la radunonza entras publicaziun el mied ufficial da publicaziun.
- ² Radunonzas extraordinarias vegnan convocadas sin giavisch da silmeins 30 commembers ni sche la suprastonza anfla ei per opportun.

Art. 14 Conclus

- ¹ La radunonza dalla pleiv sa prender conclus valeivels sch'ella ei convocada el senn da questa constituziun.
- ² Tuttas tractandas ein da predeliberar entras la suprastonza.
- ³ Per regla vegn ei decidiu cun tscharna, nun ch'in votant pretendi scrutini.
- ⁴ Tier votaziuns decida la maioritad absoluta dallas vuschs valeivlas. Ein las vuschs ulivas, decida il president.
- ⁵ Tier elecziuns vala egl emprem scrutini igl absolut pli dallas vuschs, el secund scrutini il relativ pli. Ein las vuschs ulivas, decida la sort.

Art. 15 Protocollaziun

La suprastonza dalla pleiv decida davart l'execuziun dil protocol dalla radunonza dalla pleiv. L'approbaziun dil protocol cumpeta alla proxima radunonza dalla pleiv.

3. La suprastonza

Art. 16 Incarica

- ¹ La suprastonza ei igl organ executiv ed administrativ dalla pleiv, sco era organ dalla Baselia catolic-romana dil Grischun.
- ² Ella pren e representa sias decisiuns sco autoritad collegiala.
- ³ La perioda d'uffeci cuoza treis onns ed entscheiva mintgamai suenter lelecziun entras la radunonza dalla pleiv.

Art. 17 Cumposiziun

- ¹ La suprastonza dalla pleiv constista dalla presidenta/dil president e silmeins treis ulteriuras commembras ni commembers, sco era dil plevon ni dalla menadra/dil menader dalla pleiv en cass da vacanza dil plevon.
- ² La suprastonza elegia ord siu miez la vicepresidente/il vicepresidente e las responsablas/ils responsabels dils singuls ressorts.
- ³ Ella relai in uorden da fatschenta en fuorma d'ina ordinaziun che regla las incaricas, las responsabladads e las cumpetenzas dils singuls suprastonts e dil secretariat.
- ⁴ La suprastonza sa en cass singuls delegar pensums per liquidaziun a singuls commembers dalla suprastonza ni ad ina cumissiun. Davart igl andament ed ils resultats han ils incumbensai da rapportar regularmein alla suprastonza.

Art. 18 Obligaziuns e cumpetenzas

- ¹ Las obligaziuns e cumpetenzas ein:
 - a) representar la pleiv enviers autoritads ecclesiasticas, cantunalas e communalas;
 - b) direcziun strategica ed operativa dalla pleiv;
 - c) execuziun dils decrets e dallas decisiuns dalla radunonza dalla pleiv;
 - d) relasch digl uorden da fatschenta e d'ordinaziuns executoricas el rom dalla constituziun dalla pleiv;

- e) cooperar pertuccont l'execuziun dallas leschas, uordens e conclus dalla Baselia cantunala;
- f) survegilar las fundaziuns ecclesiasticas cun direct rapport alla pleiv;
- g) preparar las fatschentas per mauns dalla radunonza dalla pleiv;
- h) relaschar il plevon ni la menadra/il menader dalla pleiv en connex cul dretg da lavur;
- i) eleger il persunal ed ils funcziunaris dalla pleiv, fixar las incaricas e las indemnizaziuns e serrar giu ils contracts da lavur;
- j) eleger ils calusters, ils organists dalla pleiv, igl archivar ed ils gidonters necessaris tenor basegns;
- k) menar il quen annual ed administrar las entradas da taglia ed l'ulteriura facultad dalla pleiv sco era dallas fundaziuns ecclesiasticas;
- l) concluder davart expensas unicas entochen frs. 50'000.00 netto ed entochen frs. 20'000.00 netto davart expensas che serepetan onn per onn;
- m) eleger ils delegai ella Baselia cantunala;
- n) menar process, recuors, serrar contracts e convenziuns risguardond litera l. Ei stat liber alla suprazonza da suttametter la damonda alla radunonza dalla pleiv;
- o) promover il svilup dalla pleiv, da purschidas ecclesiasticas, da projects ed eveniments dalla Baselia en concordanza culs responsabels principals per la pastoraziun.
- p) promover l'instrucziun religiosa en scola en concordanza culs responsabels principals per la pastoraziun;
- q) prender enonuschientscha d'entradas ella Baselia ed extradas dalla Baselia.

Art. 19 Representanza e suttascripziun

- ¹ La presidenta/il president representa la pleiv anoviars enviers tiazas persunas.
- ² La suttascripziun legalmein valeivla cumpeta alla presidenta/al president ni en cass d'impediment alla vicepresidente/al vicepresidente mintgamai ensemen cun in ulteriur consuprastont en fuorma collectiva.

Art. 20 Convocaziun e cumpetenz da decider

- ¹ La suprastanza serimna sin invitaziun dalla presidenta/dil president aschi savens che las fatschentas pretendan ni sin giavisch da treis commembers.
- ² Ella sa concluder valeivlamein sche silmeins treis commembers ein presents.
- ³ Conclus vegnan pri cun il sempel pli dils commembers presents. En cass da paritad decida tier votaziuns la presidenta/il president, tier elecziuns la sort.
- ⁴ Davart la deliberaziun dallas fatschentas ei da menar in protocol che sto cuntener silmeins ils conclus ed ils resultats dallas elecziuns.
- ⁵ Conclus sin via circulara ein valeivels mo en cass d'unanimitad.

4. Il revisorat

Art. 21 Cumposiziun e cumpetenz

- ¹ Il revisorat secumpona da
 - a) dus commembers cumpetents che disponan sur dallas qualificaziuns necessarias, ni
 - b) d'in post da gestiun da silmeins dus commembers ensemen cun in biro fiduziari extern per la controlla dalla contabilitad.
- ² Il revisorat seconstituescha sez.
- ³ Il revisorat examinescha annualmein ils quens ed il menaschi financial dalla Pleiv s. Gions sco era da tuttas baselgias, capluttas e fundaziuns da quella. El renda rapport e fa propostas a scret alla radunonza dalla pleiv.

5. Il secretariat

Art. 22 Cumposiziun ed incarica

- ¹ La suprastonza dalla pleiv elegia ina menadra/in menader dil secretariat.
- ² La secretaria/il secretari assista allas sedutas dalla suprastonza cun vusch consultativa.
- ³ La secretaria/il secretari sustegn la suprastonza dalla pleiv en sia lavur ed exequescha las decisiuns dalla suprastonza e dalla radunonza dalla pleiv.
- ⁴ La suprastonza dalla pleiv regla la incaricas, las responsablads e las cumpetenzas egl uorden da fatschenta ni en in'otra ordinaziun.

III. Fundaziuns ecclesiasticas

Art. 23 Administraziun dallas capluttas

- ¹ Las baselgias e capluttas Sogn Gions, Segnas, Cavardiras, Sogn Placi, Sontga Gada, Aletta, Cuoz, Disla, Mumpé-Medel, Mumpé-Tujetsch e Pardomat ein proprietad dalla respectiva fundaziun ecclesiastica. Ellas vegnan administradas eifer las disposiziuns dalla pleiv.
- ² Las ugadessas-caplutta/ils ugaus-caplutta vegnan eligi mintgamai per treis onns dalla suprastanza. Els procuran il necessari per las capluttas e pil survetsch divin en entelgientscha cul plevon.
- ³ Las fundaziuns han da serrar quen culs 31 da december e schar reveder tals entras il revisorat dalla pleiv. L'administraziun finanziaria dallas fundaziuns sa en concordanza cun igl ugau responsabel vegnir surdada al menader dil ressort finanzas dalla pleiv.

IV. Ordinaziuns finanzialas

Art. 24 Administraziun dalla facultad

La suprastonza procura per ina buna administraziun dil menaschi dalla pleiv. Il quen da menaschi ei da serrar mintgamai ils 31 da december.

Art. 25 Entradas

- ¹ Las entradas dalla pleiv consistan surtut da:
 - a) la taglia da pleiv;
 - b) recavs dalla facultad finanziaria ed ord las immobilias;
 - c) contribuziuns dalla Baselgia cantunala;
 - d) ulteriuras entradas sco era donaziuns e legats da tuttas sorts.
- ² La pleiv incassescha da sias commembras e ses commembers ina taglia da pleiv. Ils detagls regla la lescha da taglia dalla pleiv.

Art. 26 Diever dalla taglia da pleiv

- ¹ Las entradas vegnan applicadas per la pastoraziun e las expensas cumbinadas cun quella, sco era per ulteriurs pensums dalla pleiv stipulai en questa constituziun.
- ² Ils principis fundamentals davart ils dretgs da finanzas ston vegnir risguardai.

V. Recuors

Art. 27 Dretg da recuors

Encunter conclus e decrets dalla suprastanza dalla pleiv e dalla radunonza dalla pleiv sa vegnir recurriu enteifer 20 dis tier la cumissiun da recuors dalla Baselia catolic-romana dil Grischun.

VI. Determinaziuns finalas

Art. 28 Revisiun dalla constituziun

Questa constituziun sa da tut temps vegnir revedida parzialmein ni cumpleinamein. Leutier ei l'approbaziun dalla suprastanza dalla Baselia catolic-romana dil Grischun necessaria.

Art. 29 Directivas transitorias

- ¹ L'elecziun cumplexsiva dallas instanzas dalla pleiv che ha liug sil pli tard igl avrel 2023, succeda conform alla nova constituziun dalla pleiv.
- ² Ils commembers da suprastanza en uffeci restan en suprastanza entochen la fin da lur perioda d'uffeci.

Art. 30 Entrada en vigur

- ¹ Questa constituziun passa en vigur cun l'approbaziun entras la radunonza dalla pleiv e dalla suprastonza dalla Baselgia catolic-romana dil Grischun.
- ² Aschia concludiu a caschun dalla radunonza dalla pleiv dils 19 d'avrel 2023.

Pleiv catolic-romana s. Gions Mustér
Mustér, ils 19 d'avrel 2023

Il president:

Il vicepresidente:

Aldo Tuor

Gion Tenner

Approbau dalla Cumissiun administrativa dalla Baselgia catolic-romana dil
Grischun
Cuera, ils

Il president:

Igl actuar:

Thomas M. Bergamin

Beat Sax

